







Ed. orig. —

$\frac{1}{3}$ VehV-L.S-

W FSSS





LE PREMIER LIVRE
DES ANTIQVITEZ DE ROME,
CONTENANT VNE GENERALE
DESCRIPTION DE SA GRAN-
DEVR, ET COMME VNE DEPLO-
RATION DE SA RVINE:

PAR
IOACH. DV BELLAY ANG.

*Plus un Songe ou vision sur le mesme subiect,
du mesme autheur.*



A PARIS,

De l'imprimerie de Federic Morel, rue S. Ian
de Beauuais, au franc Meurier.

M. D. LVIII.

AVEC PRIVILEGE DV ROY.

LE PRINCE DE L'ART
DES ANTIQVITÉS ROMAINES
CONTIN. GÉNÉRALE
DESCRIPTION DE SA GRÂCE
MAVROY.
Ne vous pouuant donner ces ouvrages antiques
Pour uostre Sainct-Germain, ou pour Fontainebleau,
Ie les vous donne (Sire) en ce petit tableau
Peint, le mieux que i'ay peu, de couleurs poëtiques.
Qui mis sous uostre nom deuant les yeux publiques,
Si vous le daignez voir en son iour le plus beau,
Se pourra bien uanter d'auoir hors du tumbeau
Tiré des uieux Romains les poudrenses reliques.
Que vous puissent les Dieux un iour donner tant d'heur,
De rebastir en France une telle grandeur
Que ie la uoudrois bien peindre en uostre langage:
Et peult estre, qu'alors uostre grand' Maisté
Repensant à mes uers, diroit qu'ilz ont esté
De uostre Monarchie un bienheureux presage.

DI uins Eſprits, dont la poudreufe cendre
 Giſt ſous le faix de tant de murs couuers,
 Non uoſtre loz, qui uiſ par uoſ beaux uers
 Ne ſe uerra ſous la terre deſcendre.

Si des humains la uoix ſe peult eſtendre.
 Depuis icy inſqu'au fond des enfers,
 Soient à mon cry les abyſmes ouuers,
 Tant que d'abas uous me puiſſiez entendre..

Trois fois cernant ſous le noile des cieux
 De uoſ tombeaux le tour deuotieux,
 A haulte uoix trois fois ie uous appelle :
 I'inuoque icy uoſtre antique fureur,
 En ce pendant que d'une ſaincte horreur
 Ie uays chantant uoſtre gloire plus belle.

Le Babylonien ſes haults murs uantera;
 Et ſes uergers en l'air, de ſon Ephesienne
 La Grece deſcrira la fabrique ancienne,
 Et le peuple du Nil ſes pointes chantera :

La meſme Grece encor uanteuſe publiera
 De ſon grand Iuppiter l'image Olympienne,
 Le Mauſole ſera la gloire Carienne,
 Et ſon uieux Labyrinth' la Crete n'oublira:

L'antique Rhodien eleuera la gloire
 De ſon fameux Coloſſe, au temple de Memoire :
 Et ſi quelque œuure encor digne ſe peult uanter

De marcher en ce ranc, quelque plus grand' faconde
 Le dira: quant à moy, pour tous ie ueulx chanter
 Les ſept coſtaux Romains, ſept miracles du monde.

Nouveau uenu, qui cherches Rome en Rome,
Et rien de Rome en Rome n'apperçois,
Ces uieux palais, ces uieux arcz que tu uois,
Et ces uieux murs, c'est ce que Rome on nomme.

Voy quel orgueil, quelle ruine: & comme
Celle qui mist le monde sous ses loix
Pour donter tout, se donta quelquefois,
Et deuint proye au temps, qui tout consume.

Rome de Rome est le seul monument,
Et Rome Rome a uaincu seulement.
Le Tybre seul, qui uers la mer s'enfuit,

Reste de Rome. O mondaine inconstance !
Ce qui est ferme, est par le temps destruit,
Et ce qui fuit, au temps fait resistance.

Celle qui de son chef les estoilles passoit,
Et d'un pied sur Thetis, l'autre deffous l'Aurore,
D'une main sur le Scythe, & l'autre sur le More,
De la terre, & du ciel, la rondeur compassoit.

Iuppiter ayant peur, si plus elle croissoit,
Que l'orgueil des Geans se releuast encore,
L'accabla sous ces monts, ces sept monts qui sont ore
Tumbeaux de la grandeur qui le ciel menassoit.

Il luy mist sur le chef la croppe Saturnale,
Puis dessus l'estomac asist la Quirinale,
Sur le uentre il planta l'antique Palatin :

Mist sur la dextre main la hauteur Celienne,
Sur la fenestre asist l'eschine Exquilienne,
Viminal sur un pied, sur l'autre l'Auentin.

Qui voudra voir tout ce qu'ont peu nature,

L'art, & le ciel (Rome) te vienne voir:

I'entens fil peult ta grandeur concevoir

Par ce qui n'est que ta morte peinture.

Rome n'est plus: & si l'architecture

Quelque ombre encor de Rome fait revoir,

C'est comme un corps par magique sçavoir

Tiré de nuit hors de sa sepulture.

Le corps de Rome en cendre est deuallé,

Et son esprit reioindre s'est allé

Au grand esprit de ceste masse ronde.

Mais ses escripts, qui son loz le plus beau

Malgré le temps arrachent du tombeau,

Font son idole errer parmy le monde.

Telle que dans son char la Berecynthienne

Couronnée de tours, & ioieuse d'auoir

Enfanté tant de Dieux, telle se faisoit voir

En ses iours plus heureux ceste ville ancienne:

Ceste ville, qui fut plus que la Phrygienne

Foisonnante en enfans, & de qui le pouuoir

Fut le pouuoir du monde, & ne se peult revoir

Pareille à sa grandeur, grandeur sinon la sienne.

Rome seule pouuoit à Rome ressembler,

Rome seule pouuoit Rome faire trembler:

Aussi n'auoit permis l'ordonnance fatale,

Qu'autre pouuoir humain, tant fust audacieux,

Se uantast d'égaliser celle qui fit égale

Sa puissance à la terre, & son courage aux cieux.

S acrez costaux, & nous saintes ruines,
Qui le seul nom de Rome retenez,
Vieux monuments, qui encor soustenez
L'honneur poudreux de tant d'ames diuines:
Arcz triomphaux, pointes du ciel uoifines,
Qui de vous voir le ciel mesme estonnez,
Las peu à peu cendre vous deuenez,
Fable du peuple, & publiques rapines!
Et bien qu'au temps pour un temps facent guerre
Les bastimens, si est-ce que le temps
Oeuures & noms finablement atterre.
Tristes desirs, uiuez donques contents:
Car si le temps finist chose si dure,
Il finira la peine que l'endure.

Par armes & uaisseaux Rome donta le monde,
Et pouuoit on iuger qu'une seule cité
Auoit de sa grandeur le terme limité
Par la mesme rondeur de la terre, & de l'onde.
Et tant fut la uertu de ce peuple seconde
En uertueux nepueux, que sa posterité
Surmontant ses ayeux en braue auctorité
Mesura le hault ciel à la terre profonde:
Afin qu'ayant rangé tout pouuoir sous sa main,
Rien ne peust estre borne à l'empire Romain:
Et que, si bien le temps destruit les Republiques,
Le temps ne mist si bas la Romaine hauteur,
Que le chef deterré aux fondemens antiques,
Qui prindrent nom de luy, fust decouvert menteur.

Astres

4

Astres cruelz, & uous Dieux inhumains,
Ciel enuieux, & marastre Nature,
Soit que par ordre, ou soit qu'à l'auenture
Voyse le cours des affaires humains,

Pourquoy iadis ont trauaillé uoz mains
A façonner ce monde qui tant dure ?
Ou que ne fut de matiere aussi dure
Le braue front de ces palais Romains ?

Je ne dy plus la sentence commune,
Que toute chose au dessous de la Lune
Est corrompable, & sugette à mourir :

Mais bien ie dy (& n'en ueuille desplaire
A qui s'efforce enseigner le contraire)
Que ce grand Tout doit quelquefois perir.

Plus qu'aux bords Aetëans le braue filz d'Aeson,
Qui par enchantement conquist la riche laine,
Des dents d'un uieil serpent ensemençant la plaine
N'engendra de soldatz au champ de la toison,

Ceste ville, qui fut en sa ieune saison
Vn Hydre de guerriers, se uid brauement pleine
De braues nourrissons, dont la gloire hautaine
A remply du Soleil l'une & l'autre maison.

Mais qui finablement, ne se trouuant au monde
Hercule qui dontast semence tant feconde,
D'une horrible fureur l'un contre l'autre armez

Se moissonnarent tous par un soudain orage,
Renouuelant entre eulx la fraternelle rage,
Qui auengla iadis les fiers soldatz semez.

Mars uergongneux d'auoir donné tant d'heur

A ses nepueux, que l'impuissance humaine

Enorgueillie en l'audace Romaine

Sembloit fouler la celeste grandeur,

Refroidissant ceste premiere ardeur,

Dont le Romain auoit l'ame si pleine,

Soufla son feu, & d'une ardente haleine

Vint eschauffer la Gortrique froideur.

Ce peuple adonc, nouueau fils de la Terre,

Dardant par tout les fouldres de la guerre,

Ces braues murs accabla sous sa main,

Puis se perdit dans le sein de sa mere,

Afin que nul, fust-ce des Dieux le pere,

Se peust uanter de l'empire Romain.

Telz que lon uid iadis les enfans de la Terre

Plantez dessus les monts pour escheller les cieux,

Combattre main à main la puissance des Dieux,

Et Iuppiter contre eux, qui ses fouldres desferre:

Puis tout soudainement renuersez du tonnerre

Tumber deça dela ces squadrons furieux,

La Terre gemissante, & le Ciel glorieux

D'auoir à son honneur acheué ceste guerre:

Tel encor' on a ueu par dessus les humains

Le front audacieux des sept costaux Romains

L'euier contre le ciel son orgueilleuse face:

Et telz ores on uoid ces champs deshonnez

Regretter leur ruine, & les Dieux asseurez

Ne craindre plus là hault si effroyable audace.

Ny la

Ny la fureur de la flamme enragee,
 Ny le trenchant du fer uictorieux,
 Ny le degast du soldat furieux,
 Qui tant de fois (Rome) t'a saccagee,
 Ny coup sur coup ta fortune changee,
 Ny le ronger des siecles enuieux,
 Ny le despit des hommes & des Dieux,
 Ny contre toy ta puissance rangee,
 Ny l'esbranler des uents impetueux,
 Ny le debord de ce Dieu tortueux,
 Qui tant de fois t'a couuert de son onde,
 Ont tellement ton orgueil abbaisé,
 Que la grandeur du rien, qu'ilz t'ont laissé,
 Ne face encor' emerueiller le monde.

Comme on passe en esté le torrent sans danger,
 Qui souloit en hyuer estre roy de la plaine,
 Et raurir par les champs d'une fuite hautaine
 L'espoir du laboureur, & l'espoir du berger:
 Comme on uoid les coüiards animaux oultrager
 Le courageux lyon gisant dessus l'arene,
 En sanglancer leurs dents, & d'une audace uaine
 Prouoquer l'ennemy qui ne se peult uenger:
 Et comme deuant Troye on uid des Grecz encor
 Brauer les moins uaillans autour du corps d'Hector:
 Ainsi ceulx qui iadis souloient, à teste basse,
 Du triomphe Romain la gloire accompagner,
 Sur ces poudreux tombeaux exercent leur audace,
 Et osent les uaincuz les uainqueurs desdaigner.

Palles Esprits, & vous Vmbres poudreuses,
Qui iouissant de la clarté du iour
Fistes sortir cest orgueilleux seiour,
Dont nous uoyons les reliques cendreuses:

Dictes Esprits (ainsi les tenebreuses
Riués de Styx non passable au retour,
Vous enlaçant d'un trois fois triple tour,
N'enferment point uoz images umbreuses)

Dictes moy donc (car quelqu'une de uous
Possible encor se cache icy dessous)
Ne sentez vous augmenter uostre peine,
Quand quelquefois de ces costaux Romains
Vous contemplez l'ouurage de uoz mains
N'estre plus rien qu'une poudreuse plaine?

Comme lon uoid de loing sur la mer courroucée
Vne montaigne d'eau d'un grand branle ondoyant,
Puis trainant mille flots, d'un gros choc abboyant
Se creuer contre un roc, ou le uent l'a poussée:

Comme on uoid la fureur par l'Aquilon chassée
D'un sifflement aigu l'orage tournoyant,
Puis d'une aile plus large en l'air s'esbanoyant
Arrester tout à coup sa carrière lassée:

Et comme on uoid la flamme ondoyant en cent lieux
Se rassemblant en un, s'aguiser uers les cieux,
Puis tumber languissante: ainsi parmy le monde

Erra la Monarchie: & croissant tout ainsi
Qu'un flot, qu'un uent, qu'un feu, sa course uagabonde
Par un arrest fatal s'est uennüe perdre icy.

Tant

Tant que l'oyseau de Iuppiter uola,
 Portant le feu, dont le ciel nous menace,
 Le ciel n'eut peur de l'effroyable audace
 Qui des Geans le courage affolla :

Mais aussi tost que le Soleil brusla
 L'aile qui trop se fait la terre basse,
 La terre mist hors de sa lourde masse
 L'antique horreur qui le droit uiola.

Alors on uid la corneille Germaine
 Se deguisant feindre l'aigle Romaine,
 Et uers le ciel s'éleuer de rechef

Ces braues monts autrefois mis en poudre,
 Ne uoyant plus uoler dessus leur chef
 Ce grand oyseau ministre de la foudre.

Ces grands monceaux pierreux, ces uieux murs que tu uois,
 Furent premierement le cloz d'un lieu champestre :
 Et ces braues palais, dont le temps s'est fait maistre,
 Casines de pasteurs ont esté quelquefois.

Lors prindrent les bergers les ornemens des Roys,
 Et le dur laboureur de fer arma sa dextre :
 Puis l'annuel pouuoir le plus grand se uid estre,
 Et fut encor plus grand le pouuoir de six mois :

Qui, fait perpetuel, creut en telle puissance,
 Que l'aigle Imperial de luy print sa naissance:
 Mais le Ciel s'opposant à tel accroissement,

Mist ce pouuoir es mains du successeur de Pierre,
 Qui sous nom de pasteur, fatal à ceste terre,
 Monstre que tout retourne à son commencement.

Tout le parfait, dont le ciel nous honnore,
Tout l'imparfait qui naist deffous les cieux,
Tout ce qui paist noz esprits & noz yeux,
Et tout cela qui noz plaisirs deuore :
Tout le malheur qui nostre aage dedore,
Tout le bon heur des siecles les plus uieux,
Rome du temps de ses premiers ayeux
Le tenoit clos, ainsi qu'une Pandore.
Mais le Destin débrouillant ce Chaos,
Ou tout le bien & le mal fut enclos,
A fait depuis que les uertus diuines
Volant au ciel ont laissé les pechez,
Qui iusq' icy se sont tenus cachez
Sous les monceaux de ces uieilles ruines.

Non autrement qu'on uoid la pluuiuse niie
Des uapeurs de la terre en l'air se souleuer,
Puis se courbant en arc, à fin de s'abreuer,
Se plonger dans le sein de Thetis la chenue,
Et montant derechef d'ou elle estoit uenue,
Sous un grand uentre obscur tout le monde couuer,
Tant que finablement on la uoid se creuer
Or' en pluie, or' en neige, or' en gresle menue:
Ceste ville qui fut l'ouurage d'un pasteur,
S'éleuant peu à peu, creut en telle hauteur,
Que royne elle se uid de la terre & de l'onde :
Tant que ne pouuant plus si grand faix soustenir,
Son pouuoir dissipé s'écarta par le monde,
Monstrant que tout en rien doit un iour deuenir.

Celle

Celle que Pyrrhe & le Mars de Libye
 N'ont sceu donter, celle braue cité
 Qui d'un courage au mal exercité
 Soustint le choc de la commune enuie,

Tant que sa nef par tant d'ondes rauie
 Eut contre soy tout le monde incité,
 On n'a point ueu le roc d'aduersité
 Rompre sa course heureusement suiuite :

Mais defaillant l'obiet de sa uertu,
 Son pouuoir sest de luy mesme abbatu,
 Comme celuy, que le cruel orage

Alonguement gardé de faire abbord,
 Si trop grand uent le chasse sur le port,
 Dessus le port se uoid faire naufrage.

Quand ce braue seiour, honneur du nom Latin,
 Qui borna sa grandeur d'Afrique, & de la Bize,
 De ce peuple qui tient les bords de la Tamize,
 Et de celuy qui uoid esclorre le matin,

Anima contre soy d'un courage mutin
 Ses propres nourrissons, sa despoille conquise,
 Qu'il auoit par tant d'ans sur tout le monde acquise,
 Deuint soudainement du monde le butin:

Ainsi quand du grand Tout la fuite retournee,
 Ou trentesix mil' ans ont sa course bornee,
 Rompra des elemens le naturel accord,

Les semences qui sont meres de toutes choses,
 Retourneront encor' à leur premier discord,
 Au uentre du Chaos eternellement closes.

O que celuy estoit cautelement sage,
Qui conseilloit pour ne laisser moisir
Ses citoyens en paresseux loisir,
De pardonner aux rampars de Carthage!
Il prenoyot que le Romain courage
Impatient du languissant plaisir,
Par le repos se laisseroit saisir
A la fureur de la civile rage.
Aussi uoid-on qu'en un peuple ocieux,
Comme l'humeur en un corps uicieux,
L'ambition facilement s'engendre.
Ce qui aduint, quand l'enuieux orgueil
De ne uouloir ny plus grand, ny pareil,
Rompit l'accord du beau pere & du gendre.

Si l'aucugle fureur, qui cause les batailles,
Des pareilz animaux n'a les cœurs allumez,
Soient ceulx qui uont courant, ou soient les emplumez,
Ceulx-là qui uont rampant, ou les armez d'escailles:
Quelle ardente Erinnys de ses rouges tenailles
Vous pinsetoit les cœurs de rage enuénimez,
Quand si cruellement l'un sur l'autre animez
Vous destrempiez le fer en uoz propres entrailles?
Estoit-ce point (Romains) uostre cruel destin,
Ou quelque uieil peché qui d'un discord mutin
Exerçoit contre uous sa uengeance eternelle?
Ne permettant des Dieux le iuste iugement,
Voz murs ensanglantez par la main fraternelle
Se pouuoir asseurer d'un ferme fondement.

Que

Que n'ay-ie encor la harpe Thracienne,
 Pour réueiller de l'enfer paresseux
 Ces uieux Cefars, & les Vmbres de ceux
 Qui ont basty ceste ville ancienne?

Ou que ie n'ay celle Amphionienne,
 Pour animer d'un accord plus heureux
 De ces uieux murs les ossemens pierreux,
 Et restaurer la gloire Ausonienne?

Peusse-ie au moins d'un pinceau plus agile
 Sur le patron de quelque grand Virgile
 De ces palais les protraits façonner:

I'entreprendrois, ueu l'ardeur qui m'allume,
 De rebastir au compas de la plume
 Ce que les mains ne peuuent maçonner.

Qui voudroit figurer la Romaine grandeur
 En ses dimensions, il ne luy faudroit querre
 A la ligne, & au plomb, au compas, à l'equerre
 Sa longueur & largeur, hautesse & profondeur:

Il luy faudroit cerner d'une egale rondeur
 Tout ce que l'Ocean de ses longs bras enferme,
 Soit ou l'Astre annuel eschauffe plus la terre,
 Soit ou souffle Aquilon sa plus grande froideur.

Rome fut tout le monde, & tout le monde est Rome.
 Et si par mesmes noms mesmes choses on nomme,
 Comme du nom de Rome on se pourroit passer,

La nommant par le nom de la terre & de l'onde:
 A insi le monde on peult sur Rome compasser,
 Puis que le plan de Rome est la carte du monde.

T oy qui de Rome emerueillé contemples
L'antique orgueil, qui menassoit les cieux,
Ces uieux palais, ces monts audacieux,
Ces murs, ces arcz, ces thermes, & ces temples,
Iuge, en uoyant ces ruines si amples,
Ce qu'à rongé le temps iniurieux,
Puis qu'aux ouuriers les plus industrieux
Ces uieux fragmens encor seruent d'exemples.
Regarde apres, comme de iour en iour
Rome fouillant son antique seiour,
Se rebatist de tant d'œuvres diuines :
Tu iugeras, que le demon Romain
S'efforce encor d'une fatale main
Ressusciter ces poudrenses ruines.

Qui a ueu quelquefois un grand chesne asseiché,
Qui pour son ornement quelque trophée porte,
L'euer encor' au ciel sa uieille teste morte,
Dont le pied fermement n'est en terre fiché,
Mais qui dessus le champ plus qu'à demy panché
Monstre ses bras tous nuds, & sa racine torte,
Et sans fueille umbrageux, de son poix se supporte
Sur son tronc noüailleux en cent lieux esbranché :
Et bien qu'au premier uent il doine sa ruine,
Et maint ieune à l'entour ait ferme la racine,
Du deuot populaire estre seul reueré.
Qui tel chesne a peu uoir, qu'il imagine encores
Comme entre les citez, qui plus florissent ores,
Ce uieil honneur poudreux est le plus honoré.

Tout

Tout ce qu'Egypte en pointte fagonna,
 Tout ce que Grece à la Corinthienne,
 A l'Ionique, Attique, ou Dorienne,
 Pour l'ornement des temples magonna:
 Tout ce que l'art de Lysippe donna,
 La main d'Apelle, ou la main Phidienne,
 Souloit orner ceste ville ancienne,
 Dont la grandeur le ciel mesme estonna:
 Tout ce qu'Athenè eut onques de sagesse,
 Tout ce qu'Asie eut onques de richesse,
 Tout ce qu'Afrique eut onques de nouveau,
 S'est ueu icy. ô merueille profonde!
 Rome uiuant fut l'ornement du monde,
 Et morte elle est du monde le tumbau.

Comme le champ semé en uerdure foisonne,
 De uerdure se haulse en tuyau uerdissant,
 Du tuyau se herisse en epic florissant,
 D'epic iaunit en grain, que le chaud assaisonne:
 Et comme en la saison le rustique moissonne
 Les ondoyans cheueux du sillon blondissant,
 Les met d'ordre en iauelle, & du blé iaunissant
 Sur le champ despouillé mille gerbes fagonne:
 Ainsi de peu à peu creut l'empire Romain,
 Tant qu'il fut despouillé par la Barbare main,
 Qui ne laissa de luy que ces marques antiques,
 Que chacun ua pillant: comme on uoid le gleneur
 Cheminant pas à pas recueillir les reliques
 De ce qui ua tumbant apres le moissonneur.

De ce qu'on ne uoid plus qu'une uague campagne,
O u tout l'orgueil du monde on a ueu quelquefois,
Tu n'en n'es pas coupable, ô quiconques tu sois
Que le Tygre, & le Nil, Gange, & Euphrate baigne :
Coupables n'en sont pas l'Afrique ny l'Eſpaigne,
Ny ce peuple qui tient les riuages Anglois,
Ny ce braue ſoldat qui boit le Rhin Gaulois,
Ny ceſt autre guerrier, nourriſſon d'Alemaigne .
Tu en es ſeule cauſe, ô ciuile fureur,
Qui ſemant par les champs l'Emathienne horreur,
Armas le propre gendre encontre ſon beaupere :
Afin qu'eſtant uenue à ſon degré plus hault,
La Romaine grandeur trop longuement proſpere,
Se uiſt ruer à bas d'un plus horrible ſault .

Eſperex uous que la poſterité
Do iue (mes uers) pour tout iamais uous lire ?
Eſperex uous que l'œuure d'une lyre
Puiſſe acquerir telle immortalité ?
Si ſous le ciel fuſt quelque eternité,
Les monuments que ie uous ay fait dire,
Non en papier, mais en marbre & porphyre,
Euſſent gardé leur uiue antiquité .
Ne laiſſe pas touteſois de ſonner
Luth, qu'Apollon m'a bien daigné donner :
Car ſi le temps ta gloire ne deſrobbe ,
Vanter te peux, quelque bas que tu ſois ,
D'auoir chanté le premier des François ,
L'antique honneur du peuple à longue robbe .



*'Etoit alors que le present des Dieux
Plus doucement s'écoule aux yeux de l'homme,
Faisant noyer dedans l'oubly du somme
Tout le soucy du iour laborieux,*

*Quand un Démon apparut à mes yeux.
Dessus le bord du grand fleuve de Rome,
Qui m'appellant du nom dont ie me nomme,
Me commanda regarder uers les cieux:
Puis m'escria, Voy (dit-il) & contemple
Tout ce qui est compris sous ce grand temple,
Voy comme tout n'est rien que uanité.
Lors cognoissant la mondaine inconstance,
Puis que Dieu seul au temps fait resistance,
N'espere rien qu'en la diuinité.*

*Sur la crotte d'un mont ie uis une Fabrique
De cent brasses de hault .cent colonnes d'un rond
Toutes de diamant ornoient le braue front:
Et la façon de l'œuure estoit à la Dorique.
La muraille n'estoit de marbre ny de brique,
Mais d'un luisant crystal, qui du sommet au fond
Elangoit mille raiz de son uentre profond
Sur cent degrez dorez du plus fin or d'Afrique.
D'or estoit le lambriz, & le sommet encor
Reluisoit escaillé de grandes lames d'or:
Le paué fut de iasse, & d'esmeraulde fine.
O uanité du monde ! un soudain tremblement
Faisant crouler du mont la plus basse racine,
Renuersa ce beau lieu depuis le fondement.*

Puis m'apparut une Poincte aguisee
D'un diamant de dix piedz en carré,
A sa hauteur iustement mesuré,
Tant qu'un archer pourroit prendre uisee.

Sur ceste poincte une urne fut posee
De ce metal sur tous plus honoré:
Et reposoit en ce uase doré
D'un grand Cesar la cendre composee.

Aux quatre coings estoient couchez encor
Pour pedestal quatre grans lyons d'or,
Digne tumbeau d'une si digne cendre.

Las rien ne dure au monde que torment!
Ie uy du ciel la tempeste descendre,
Et foudroyer ce braue monument.

Ie uy hault esleué sur colonnes d'iuoire,
Dont les bases estoient du plus riche metal,
A chapiteaux d'albastre, & frizes de crystal,
Le double front d'un arc dressé pour la memoire.

A chaque face estoit protraicte une victoire,
Portant ailes au doz, avec habit nymphal,
Et hault assise y fut sur un char triomphal
Des Empereurs Romains la plus antique gloire.

L'ouvrage ne monstroit un artifice humain,
Mais sembloit estre fait de celle propre main
Qui forge en aguissant la paternelle foudre.

Las ie ne ueulx plus noir rien de bean sous les cieux,
Puis qu'un ceuvre si bean i'ay uen denant mes yeux,
D'une soudaine cheute estre reduict en poudre.

Et

Et puis ie uy l'Arbre Dodonien

Sur sept costaux esandre son umbrage,
Et les uainqueurs ornez de son fueillage
Dessus le bord du fleuve Ausonien.

Là fut dressé maint trophée ancien,

Mainte despoille, & maint beau tesmoignage
De la grandeur de ce braue lignage
Qui descendit du sang Dardanien.

I'estois rauy de uoir chose si rare,

Quand de paisans une troppe barbare
Vint oultrager l'honneur de ces rameaux.

I'ouy le tronc gemir sous la congne,

Et uy depuis la fouche desdaignée
Se reuerdir en deux arbres iumeaux.

Vne Louue ie uy sous l'antre d'un rocher

Allaictant deux bessons. ie uis à sa mamelle
Mignardement iouer ceste couple iumelle,
Et d'un col allongé la Louue les lecher.

Ie la uy hors de là sa pasture chercher,

Et courant par les champs, d'une fureur nouuelle
Ensanglanter la dent & la patte cruelle
Sur les menus troppeaux pour sa foie estancher.

Ie uy mille ueneurs descendre des montagnes,

Qui bornent d'un costé les Lombardes campagnes,
Et uy de cent espieux luy donner dans le flanc.

Ie la uy de son long sur la plaine estendue

Poussant mille sanglotz, se ueautrer en son sang,
Et dessus un vieux tronc la despoille pendue.

Ie uyl Oyseau, qui le Soleil contemple,
D'un foible uol au ciel sauanturer,
Et peu à peu ses ailes assseurer,
Suiuuant encor le maternel exemple.

Ie le uy croistre, & d'un uoler plus ample
Des plus hauts monts la hauteur mesurer,
Percer la nuë, & ses ailes tirer
Iusques au lieu, ou des Dieux est le temple.

Là se perdit: puis soudain ie l'ay ueu
Rouant par l'air en tourbillon de feu,
Tout enflammé sur la plaine descendre.

Ie uy son corps en poudre tout reduit,
Et uyl l'oyseau, qui la lumiere fuit,
Comme un uermet renaistre de sa cendre.

Ie uis un fier Torrent, dont les flots escumeux
Rongeoient les fondemens d'une uieille ruine:
Ie le uy tout couuert d'une obscure bruine,
Qui s'éleuoit par l'air en tourbillons fumeux:
Dont se formoit un corps à sept chefx merueilleux,
Qui uilles & chasteaux couuoit sous sa poitrine,
Et sembloit deuorer d'une egale rapine
Les plus doux animaux, & les plus orgueilleux.

I'estois emerueillé de uoir ce monstre enorme
Changer en cent façons son effroyable forme,
Lors que ie uy sortir d'un antre Scythien
Ce uent impetueux, qui soufle la froidure,
Disiper ces nuaux, & en si peu que rien
S'esuanouir par l'air ceste horrible figure.

Tout

Tout effroyé de ce monstre nocturne,
 Ie vis un Corps hydeusement nerveux,
 A longue barbe, à long flottans cheueux,
 A front ridé, & face de Saturne :

Qui s'accoudant sur le uentre d'une urne,
 Versoit une eau, dont le cours fluctueux
 Alloit baignant tout ce bord sinueux
 Ou le Troyen combattit contre Turne .

Deffous ses piedz une Louue allaitoit
 Deux enfans : sa main dextre portoit
 L'arbre de paix, l'autre la palme forte :

Son chef estoit couronné de laurier .
 A donc luy cheut la palme, & l'olurier,
 Et du laurier la branche devint morte .

Sur la rive d'un fleuve une Nymphé esplorée,
 Croisant les bras au ciel avec mille sanglots,
 Accordoit ceste plainte au murmure des flots,
 Oultrageant son beau teint, & sa tresse dorée :

Las ou est maintenant ceste face honorée,
 Ou est ceste grandeur, & cest antique los,
 Ou tout l'heur & l'honneur du monde fut enclos,
 Quand des hommes i'estois, & des Dieux adorée ?

N'estoit-ce pas assez que le discord mutin
 M'eut fait de tout le monde un public butin,
 Si cest Hydre nouveau, digne de cent Hercules,

Foissonnant en sept chefs de uices monstrueux,
 Ne m'engendroit encor à ces bords tortueux
 Tant de cruelz Nerons, & tant de Caligules ?

Dessus un mont une Flamme allumee
A triple poincte ondoyoit uers les cieux,
Qui de l'encens d'un cedre precieux
Parfumoit l'air d'une odeur embasmee.

D'un blancoyseau l'aile bien emplumee
Sembloit uoler iusqu'au seiour des Dieux,
Et degoisant un chant melodieux
Montoit au ciel avecques la fumer.

De ce beau feu les rayons escartez,
Langoient par tout mille & mille clartez,
Quand le degout d'une pluie doree

Le uint esteindre. ô triste changement!
Ce qui sentoit si bon premierement,
Fut corrompu d'une odeur sulphuree.

Ie uy soudre d'un roc une uine Fontaine,
Claire comme crystal aux rayons du Soleil,
Et iaunissant au fond d'un sablon tout pareil
A celui que Pactol' roule parmy la plaine.

Là sembloit que nature & l'art eussent pris peine
D'assembler en un lieu tous les plaisirs de l'œil:
Et là soyoit un bruit incitant au sommeil,
De cent accords plus doux que ceulx d'une Sirene.

Les sieges & relaiſ luisoient d'iuoir blanc,
Et cent Nymphes autour se tenoient flanc à flanc,
Quand des monts plus prochains de Faunes une suyte

En effroyables criz sur le lieu s'assembla,
Qui de ses uillains piedz la belle onde troubla,
Mist les sieges par terre, & les Nymphes en fuyte.

Plus

Plus riche assez que ne se monstroit celle
 Qui apparut au triste Florentin,
 Iettant ma uëie au riuage Latin,
 Je uy de loing surgir une Nafelle :
 Mais tout soudain la tempeste cruelle,
 Portant enuie à si riche butin,
 Vint assaillir d'un Aquilon mutin
 La belle Nef des autres la plus belle .
 Finablement l'orage impetueux
 Fit abysmer d'un gouphre tortueux
 La grand' richesse à nulle autre seconde.
 Je uy sous l'eau perdre le beau thresor,
 La belle Nef, & les Nochers encor,
 Puis uy la Nef se ressourdre sur l'onde .

Ayant tant de malheurs gemy profondement,
 Je uis une Cité quasi semblable à celle
 Que uid le messager de la bonne nouuelle,
 Mais basty sur le sable estoit son fondement .
 Il sembloit que son cheftouchast au firmament,
 Et sa forme n'estoit moins superbe que belle:
 Digne, s'il en fut onc, digne d'estre immortelle,
 Si rien desous le ciel se fendoit fermement.
 I'estois emerueillé de voir si bel ouurage,
 Quand du costé de Nort uint le cruel orage,
 Qui soufflant la fureur de son cœur despité
 Sur tout ce qui s'oppose encontre sa uenüe,
 Renuersa sur le champ, d'une poudreuse nüe,
 Les foibles fondemens de la grande Cité .


Finablement sur le pointt que Morphee
Plus ueritable apparoit à noz yeux,
Fasché de uoir l'inconstance des cieux,
Ie uoy uenir la sœur du grand Typhée:
Qui brauement d'un morion coiffée
En maiesté sembloit egale aux Dieux,
Et sur le bord d'un fleuve audacieux
De tout le monde erigeoit un trophée.
Cent Roys uaincuz gemissoient à ses piedz,
Les bras aux doz honteusement liez:
Lors effroyé de uoir telle merueille,
Le ciel encore ie luy uoy guerroyer,
Puis tout à coup ie la uoy foudroyer,
Et du grand bruit en sursault ie m'esueille.

FIN.


PRIVILEGE DV ROY.


HENRY par la grace de Dieu Roy de France, à tous ceulx qui ces presentes lettres verront, salut. Feu nostre treshonnoré Seigneur & Pere, le Roy dernier decédé, qui pour l'affection & faueur qu'il portoit aux bonnes lettres, fut meritoirement dict & nommé le refuge des Muses, & de tous amateurs de la vertu, cognoissant, que la gloire & autre fruit des victoires, triomphes & faicts heroiques, & de tous autres actes vertueux & memorables, seroient de bien petite duree silz n'estoient perpetuez par les lettres, lesquelles seules ont eu le pouuoir de defendre & garder de l'obly & iniure du tēps les vertus & miracles de l'ancienneté, pour seruir d'exemple & doctrine à nostre siecle & autres aduenir, desirant à ceste cause faire florir nostre Royaume, non moins par la science & exercice des bonnes lettres, que par la vertu militaire, augmenta de son temps & illustra nostre Vniuersité de Paris de bon nombre de personages notables, doctes, & tresbien exercez es langues Hebreë, Grecque, & Latine, leur ordonnant bons & suffisans gages & salaires sur ses propres finances: ce que, graces à Dieu, a si prosperement fructifié, que bonne partie de la ieunesse de nostre Royaume est à present tresbien instruite & edifiée tāt esdictes langues, que aux artz, sciēces & doctrines, qui par icelles nous sont communiqees, dont nous esperons que nostre langue Françoisē, qui a esté cy deuant aucunement indigente & peu polie, se pourra facilement agencer, polir, & rendre aussi copieuse & facodē que les dessudictes & autres quelcōques peregrines lāgues. Pour ce est il, Que nous ne desirās moins que nostredit feu seigneur & pere, l'augmentatiō des bonnes lettres & illustratiō de nostredicte langue Françoisē, & à ces fins les œuures des bons aucteurs (du nōbre desquelz est nostre cher & bien amē Ioachim Dubellay) estre bien elegamment & correctement (comme elles meritent) imprimees, Auons à iceluy Dubellay enioinct & trefexpressément enioignons eslire, choisir & commettre tel Imprimeur doctē & diligent qu'il verra & cognoistra estre suffisant pour fidelement imprimer les œuures par luy ia mises en lumiere, & autres qu'il composera & escrira cy apres: inhibant & neantmoins defendāt à tous Imprimeurs, Libraires, marchāds & autres quelconques, qu'ilz n'ayēt à imprimer ne faire imprimer aucunes des œuures que par ledict Dubellay ont esté & seront cy apres faictes & composees, ne en exposer aucunes en vente, si elles n'ont esté & sont imprimees par ses permission, licence & cōgé, ou de l'imprimeur par luy choisi & commis à l'impression d'icelles. Et ce, sur peine de confiscation des liures ia imprimez ou à imprimer, & d'amēde arbitraire, tant enuers nous, qu'enuers ledict Dubellay, & des interestz & dommages de l'imprimeur par luy choisi & esleu. Si donōs en mādēmēt par ces presentes à noz amez & feaulx les gēs de noz courtz de Parlement, preuostz, baillifz, seneschaulx, & à tous noz autres iusticiers & officiers, ou leurs lieutenāds, & chacū d'eulx, sicōme à luy appartiēdra, Que de noz presentes iniunctiō, inhibitions & defenses, & de tout le cōtenu en ces presentes, ilz fassent garder & obseruer de point en point selō leur forme & teneur, cōme noz propres edictz & ordōnāces, procedāt ou faisant proceder cōtre les trāsgresseurs d'icelles cōme infracteurs de nōdictes ordōnāces, & autres peines dessudictes, pourueu que esdicts liures n'y ait chose qui cōtrarie à la religion & foy catholique, nonobstant quelconques edictz, ordōnances, priuileges, & lettres octroices & à octroier à ce cōtraires: ausquelz & aux clauses derogatoires qui seroient ou pourroient estre cōtenues. Nous auons derogē & derogeōs par ces presentes, par lesquelles mādons & cōmādōs au premier nostre huissier ou sergēt sur ce requis, icelles signifier à tous Imprimeurs, Libraires, marchāds & autres qu'il appartiēdra, à fin qu'ilz n'en puissent pretendre aucune cause d'ignorance. Et pour ce que de ces presentes on pourra auoir affaire en plusieurs & diuers lieux, nous voulōs que au Vidimus d'icelles fait sous seel Royal ou par l'un de noz amez & feaulx notaires & secretaires foy soit adioutee comme au present original, auquel en tesmoing de ce nous auōs fait mettre nostre seel. Donnē à Fontainebleau ce troisieme iour de Mars, l'an de grace Mil cinq cens cinquante sept, & de nostre regne le vnieme.

Par le Roy, le seigneur Dauenson Conseiller au priuē conseil, present. Signē Duthier.













SPECIAL 8-B
33621

